

Listovi

Listovi gračaničkog kalendara od 13.5 2001. do 10.11.2001.

22. 5. 2001.

Otvoren novi most na Spreči kod Karanovca

Pošto je zbog tehničkih nedostataka ili nečega drugog prvi postdejtonski most na Spreči kod Karanovca morao biti demontiran, izgrađen je novi i pred mnoštvom zvaničnika i gostiju pušten u saobraćaj. Sa sličnim ceremonijalom puštana su i njegova dva prethodnika. Valja da ovaj neće doživjeti njihovu sudbinu.

23. 5. 2001.

Dvanaesta sjednica općinskog vijeća: u znaku strateških projekata

Usvojena su tri odnosno četiri važna dokumenta: regulacioni planovi «Centar» i «Bazen III», zatim «Strateški dokument općine Gračanica» i «Stanje i perspektive razvoja poljoprivredne proizvodnje na području općine Gračanica». Usvajanjem pomenutih regulacionih planova, unosi se više reda u oblasti prostornog uređenja na prostoru grada Gračanice, otklanjaju se subjektivne ocjene nadležnih organa pri rješavanju zahtjeva građana, a eliminisat će se i nedoumice koje su izazivale dugotrajne sporove u postupku dodjele lokacija i zemljišta. Prema «Strateškom dokumentu općine Gračanica», do 2003. godine Gračanica će se razvijati u «prosperitetan poduzetnički centar, koji će na bazi tradicionalnih vrijednosti, kvaliteta i prirodnih pretpostavki kreirati nova radna mjesta i stalno unapređivati svoj poslovni milje, bazirajući se na proizvodnji zdrave hrane u oblasti povrtlarstva, voćarstva, peradarstva i stočarstva, koristeći mineralno-termalne potencijale, te

"Listao"
Omer Hamzić

dalje razvijati finalnu drvenu proizvodnju, proizvodnju građevinskih materijala, metala, kožarsku i tekstilnu industriju, preradu plastike i zanatske djelatnosti sa kooperativama.

Na tragu ciljeva ove «Strategije» urađen je i dokument o stanju i perspektivama razvoja poljoprivredne proizvodnje na općini u kojem su utvrđeni sljedeći ciljevi: moderna i neusporedivo veća proizvodnja hrane, povećanje zaposlenosti u ruralnim područjima, osposobljavanje poljoprivrednih gazdinstava kao pravih robnih proizvođača i zaštita poljoprivrednih resursa. Temeljni oslonac za ostvarenje ovih ciljeva je porodično gazdinstvo, te postojeće, ali i nove tržišno orijentisane poljoprivredne asocijacije.

25.5.2001.

Obilježen Dan odbrane Gračanice

Do sada se ovaj datum obilježavao kao Dan općine Gračanica. Novom općinskom odlukom o obilježavanju značajnih datuma, ove godine prvi puta se obilježava pod novim nazivom – kao Dan odbrane općine Gračanica. održana je svečana sjednica Općinskog vijeća na kojoj su evocirane uspomene na 25. maj, 1992. godine, kada je Gračanica doživjela najžešći artiljerijski napad sa Ozrena, velike ljudske i materijalne gubitke. Toga dana Gračanica je uspjela odvratiti napad, toga dana uspjela se odbraniti... Stoga je ovo jedan od najslavnijih datuma u historiji ovoga grada – rečeno je u prigodnom referatu, kojeg je pročitao Midhat Alić, predsjedavajući Općinskog vijeća Gračanica.

Obilježavanjem Dana odbrane Gračanice označen je početak brojnih jedinstvene manifestacije pod nazivom «Dani Gračanice», koja će se završiti 2. juna, kada se obilježava novoustanovljeni Dan općine.

31.5.2001.

«Gračanički glasnik» - promovisana jedanaestka, tematski posvećena Sokolu

Promotivno slovo za jedanaesti broj (ali i deseti, koji nije zvanično promovisan) pripremio je poznati književnik i publicista iz Tuzle Zlatko Dukić, a pročitao ga je (zato što je Dukić bio iznenada spriječen da dođe na promociju), Edin Šaković, mladi suradnik Časopisa iz Gračanice, student Filozofskog fakulteta u Tuzli. Svoje nadahnuto izlaganje o «Glasniku» kao kulturnoj činjenici, ne štedeći riječi hvale, Dukić završava sljedećom konstatacijom: «U ustajaloj, zaparloženoj, zabrinjavajuće indolentnoj duhovnoj klimi, u vaktu kad je više nepismenih nego sitih u ovoj zemlji «Gračanički glasnik» se doima kao velevrijedan incident, kao eksces koji ima naum da «podere» tu bolnu tišinu, to mirenje s indolencijom, nečinjenjem, s bezizlazom i rezignacijom, pokazujući da ipak ima, itekako ima ostataka volje, kureta, odvažnosti i kuraži da se od zaborava i brisanja sačuva prošlo i da se za budućnost ostavi ono što nas danas šamara... Dovoljno da se kapa skine. Incidentu, po imenu «Gračanički glasnik».

Budući da se radi o tematskom broju u kojem su svi tekstovi vezani za selo Soko, u okviru promocije predavanje na temu «Savremena Bosna i Srednjovjekovni grad Sokol» održao je prof.dr. Salih Jaliman, univerzitetski profesor i saradnik Časopisa.

2.6.2001.

Obilježen novouspostavljeni Dan općine Gračanica

S ovim datumom završava se jedinstvena manifestacija «Dani Gračanice», koja je obilovala nizom prigodnih kulturnih i

sportskih manifestacija, više komemoracija i prisjećanja na one koji su položili živote u odbrani Bosne. U svom prigodnom referatu, na svečanoj sjednici Općinskog vijeća, načelnik općine Gračanica Nusret Helić je naglasio da uvođenje novog datuma nije posljedica političkih promjena, pomodarstva ili poznate prakse – da svaka vlast uvodi svoje dane i blagdane – već naprotiv! «Prihvatajući najstariji pomen Gračanice i njezine okoline u historijskim dokumentima kao Dan općine, mi želimo da prekinemo sa tom praksom, naravno ne zanemarujući ni one datume koje smo do sada obilježavali kao Dan općine (misli se na 7. april i 25. maj, nap. ur.) i koji će i dalje imati dostojno mjesto u našem općinskom kalendaru», poručio je Helić



Na svečanoj sjednici dodijeljena su tradicionalna općinska priznanja zaslužnim kolektivima i pojedincima. *Zlatna plaketa:* Gimnazija «Dr. Mustafa karamić» i privatna firma DOO «Sax»; *Srebrna plaketa:* «Indeks», «Plastex» i «Plastprom» (privatne firme); *Zlatne značke:* Hajrudin Čudić, Ibrahim Hasić i Katarina Ivanišević;

Srebrene značke: Mustafa Ahmetagić, Ejub Ćosić, Mustafa Grbić, Mersija Kukuruzović i Divna Trepanić. Za počasnog građanina Gračanice proglašena je Lučija Zanarella iz Padove (Italija), veliki humanista i prijatelj Gračanice još iz vremena rata.

U sklopu svečanosti povodom Dana općine, u Tvornici obuće «Fortuna» pušten je u rad novi pogon montaže (zajedničko ulaganje sa talijanskim partnerom «Roseta») i otkriveno spomen obilježje u znak sjećanja na 12 poginulih radnika ovog kolektiva u ratu za BiH (1992-1995).

14.6.2001.

Muhamed Selimović novi šef SDP u Gračanici

Njegovi zamjenici su Sabina Hasić i Nihad Sinanović. To je odluka novoizabranog Opštinskog odbora SDP, kojom se okončava izborna aktivnost u ovoj političkoj stranci na području opštine Gračanica.

18.6.2001.

Trinaesta sjednica Općinskog vijeća: ostvarenje Općinskog Budžeta za 5 mjeseci te 30% u odnosu na plan

Znalo se na početku godine da će zbog budžetske suše «boliti glava», ali da će biti ovako intenzivna glavobolja to niko nije mogao ni pretpostaviti. Nikakva utjeha za uskraćene budžetske korisnike nije ni podatak da je slično stanje i sa Budžetom Tuzlanskog kantona i svih njegovih 13 opština. Uzroka ima više, ali se ni jedan ne može otkloniti sa opštinskog, pa ni kantonalnog nivoa. Zato mnoga obećanja nove vlasti padaju u vodu. Hoće li se nešto poduzeti sa takozvane više instance (Federacije i BiH), ostaje da se vidi.

Hoće li dotle takozvani budžetski korisnici izgubiti strpljenje?

18. 6. 2001.

Otvoren Centar hemodijalize u okviru Opće bolnice u Gračanici

To je organizaciona jedinica u okviru gračaničke bolnice "Dr. Mustafa Beganović" u koju je uloženo oko 400.000 KM. Riječ je o najmodernijim mašinama iz te oblasti koje su namijenjene za 22 pacijenta s područja gračaničke, ali i iz susjednih općina. Ti pacijenti neće više morati putovati na odjel hemodijalize u Tuzli, koji je ionako "prebukiran".

19. 6. 2001.

Kiše padaju: proglašeno stanje elementarne nepogode na opštini Gračanica

Više od 48 sati neprestano je kišilo u ovom kraju, izlile su rijeke, nanesena velika šteta poljoprivredi, posebno u selima pored Spreče, dobrim dijelom uništena putna mreža, komisije procjenjuju štetu. Načelnik opštine proglasio «stanje elementarne nepogode»

7. 7. 2001.

Vanredna sjednica Općinskog vijeća Gračanica: posljedice poplava od 20. do 25. 6. 2001.

Oštećena su 163 stambena i gospodarska objekta, potpuno uništeno 778 i djelimično oštećeno 196 hektara zasijanih površina, oštećeno 8.844 metra saobraćajnica, aktivirana su 144 klizišta na površini od 190.000 kvadratnih metara

Zaključeno je da se urade konačne procjene šteta na osnovu jedinstvene metodologije Tuzlanskog kantona, da se izvrši analiza zemljišta u Sprečkom polju, te da se vlasnici zemljišta u skladu sa za-

onom oslobode poreza na poljoprivredu. Vijećnici su zatražili odgovornost Vodoprivrede za nekontrolisano ispuštanje vode jezera Modrac i odgovornost privrednih subjekata za ispuštanje otrovnih materija.

12. 7. 2001.

Hasan Kikić "ponovo" u Gračanici

Na inicijativu Nastavničkog vijeća Prve osnovne škole u Gračanici, Skupština Tuzlanskog kantona donijela je odluku da toj Javnoj ustanovi vrati nekadašnje ime Hasana Kikića, koje je nosila od 16.12.1959. do sredine 1993. godine, kada je odlukom Ratnog predsjedništva opštine Gračanica Hasan Kikić izbrisan iz njenog naziva. Srećom, i dalje je ostala bista ovog znamenitog bošnjačkog književnika u dvorištu te škole. Vraćanjem njegovog imena tek sada je sve na svom mjestu.

23. 7. 2001.

Faruk Mujić izvršio samoubistvo

Po svemu sudeći, zauvijek će ostati tajna zašto je ovaj ugledni Gračanlija i istaknuti privrednik, dugogodišnji direktor gračaničke «Fortune», doajen među ovdašnjim direktorima digao ruku na sebe – bolest, razočarenje, rezignacija, ko zna...

Ova iznenadna smrt šokirala je Gračanlije, a njegovu porodicu zavela u tugu i neprebolnu žalost.

6. 8. 2001.

Privatizacija na gračaničkoj opštini: od 25 privatizirano 17 preduzeća

To su: "Avis", "Građevinar", "Terme", "Zanati", "Transport i mehanizacija", "Autokomerc", "Transport", "Kokaprodukt", "Grin", "Bosna", "Fering", "Jadrina", "Ozrenka", "Grafopek", "Distributivni centar" i "Park". Preduzeće "Stočar" prodato je u procesu male privatizacije, dok je u

preduzeću "Projekt" pokrenut stečajni postupak. Privatizacija preostalog dijela kapitala u toku je u sljedećim preduzećima: "Graplast", "Olimp" i "Fortuna".

Sve po planu – za sada.

11.8.2001.

Otvorena džamija u Vranovićima

Izgradnju ove džamije džematlije Vranovića započeli su prije rata i gradili je uglavnom vlastitim sredstvima, prema svojim potrebama i mogućnostima. Poseban značaj i izuzetnu vrijednost takvih "narodnih" objekata naglasio je u svom nadahnutom govoru, pred mnogobrojnim vjernicima i Reis-ul-ulema Mustafa ef. Cerić, upućujući riječi pohvale džematlijama Vranovića i svima onima koji su pomogli izgradnju te džamije.

22.8.2001.

Sedmi Sarajevo film festival i u Gračanici

Osim ljubitelja filma u Sarajevu, Zenici i Tuzli, ovu prestižnu reviju najboljih svjetskih filmskih ostvarenja imali su priliku «odgledati» i Gračanici. Na «velikom ekranu» Bosanskog kulturnog centra u Gračanici prikazano je devet najboljih filmova Sarajevskog filmskog festivala: «Perl Harbour» (USA), «Dućan snova» (USA), «Dnevnik Bridžit Džons» (Francuska, UK, USA), «Tomb Raider» (USA, UK), «Hanibal» (UK, USA), «Spy kids» (USA), «Šrek» (USA), «Moulen Rouge» (Australija, USA), «Šta žene vole» (USA).



Džamija u Vranovićima

22.8.2001.

Na gračaničkoj opštini poplave "odnijele" 12,3 miliona maraka

Nakon skoro dvomjesečnog rada, do tog podatka došla je posebna opštinska komisija za procjenu šteta. Najveće štete su u poljoprivredi (5,5 miliona), zatim na klizištima (3 miliona), na putevima (1,5 miliona) itd. Mnogo vode Sokolušom proteći će dok se ove štete makar djelimično saniraju.



25.8.2001.

Malešići: nema više žedi

Iako je imalo više odvojenih, ali nekvalitetno urađenih vodovodnih sistema, ovo selo je pripadalo grupi naselja sa najizraženijim problemom vodosnabdijevanja na području opštine Gračanica. Stoga je novo rukovodstvo mjesne zajednice Malešići odlučilo da pitanje vode proglasi zadatkom broj jedan, da na tom zadatku mobilize cjelokupno stanovništvo, da traži pomoć, da istraje...

Prvo je izvršena sanacija ranije zacijevljene bušotine (bunara), zatim su nabavljena i instalirana pumpna postrojenja koja doturaju vodu do dva, međusobno spojena bazena zapremine 200 kubnih metara, izgrađena je potpuno nova vodovodna mreža dužine oko 30 kilometara, u koju "dolazi" oko 5/l sec, ugrađeno 750 vodomjera... Ukupna vrijednost investicije je 450.000 KM, vlastito učešće mještana 350.000 KM, ostalo – pomoć i donacije. Nema više žedi i cisterni... To je samo dio raporta Ibrahima Hasića, predsjednika Mjesne zajednice Malešići prilikom svečanog puštanja malešićkog vodosistema u upotrebu.

Na redu je cesta do Gračanice. Pripreme teku ko voda.

8.9.2001.

Rašljeva: prvi metri asfalta i izlaz na Donju Orahovicu

"Izliveno" je 1000 metara asfalta na lokalnoj saobraćajnici između mahale Brdo i mahale Omerbašići, plaćeno 100.000 KM, akcija "marka na marku" urodila plodom, veselje u selu.

U isto vrijeme "probijaju" put do Rijeke u Donjoj Orahovici, po ravnom i pristupačnom terenu. Davnašnji san ovih brdana polahko se ostvaruje. Ravnicom

kući... Pomažu i inženjerske jedinice Drugog korpusa Vojske Federacije, tri mosta dižu na viši nivo, nasipaju...

11.9.2001.

Napad na SAD

Amerika i svijet u šoku.

Oteti avioni civilne američke avijacije, samoubilačkim udarom srušili svjetski trgovački centar u Njujorku i isti takav udar izveli na sjedište Pentagona u Njujorku. Dok centar Njujorka još uvijek gori, već se baca sumnja na muslimanske ekstremiste, Bin Ladena, avganistanske talibane, optužuje se islam, prijeti odmazdom... Ništa neće biti kao prije. Posljedice terorističkog udara osjetit će se na čitavoj zemaljskoj kugli. U Bosni posebno...

13.9.2001.

Nakon udara na SAD, objavljen rat – terorizmu

Utorak, 11. septembar 2001. godine, ostat će zabilježen na stranicama historije kao crni dan za Ameriku.

I ne samo Ameriku, već i za cijeli civilizirani svijet.

Nevini ljudski životi brojat će se još danima. Možda i se-dmicama. Zna se da ih je na hiljade. Tačan broj još niko u ovom trenu ne može ni pretpostaviti, jer i spasioci ostaju zatrpani pod ruševinama.

Ko god je počinio ovaj do sada nevijen i civilizaciji nepo-znat teroristički napad morat će kad-tad odgovarati.

Američki predsjednik Džordž Buš najavio je da neće sjedi-ti skrštenih ruku. Kreće se u rat protiv terorizma. U obračunu sa teroristima Amerika neće ostati usamljena.

Pokazuju to i reakcije svih svjetskih državnika, koji su već u svojim prvim izja-

vama punim nevjerice da se takvo što ika-da moglo dogoditi u civiliziranom svijetu, a posebice u Amer-ici, ponudili svoju pomoć.

Čak i dojučerašnji ljuti neprijatelji iz perioda hladnog rata, Rusi, tačnije ruska kontraobavještajna služba, sarađuje i s američkim i sa kolegama obavještajcima na Bliskom Istoku.

Da bi se spriječili mogući novi teroristički napadi, ali i da se uđe u trag osobama koje su u roku od pola sata uspjele zaviti SAD i svijet u crno.

Terorizam se pokazao u svom najgorem mogućem obliku. Svi dosadašnji napadi širom svijeta, koji su okarakterizirani kao teroristički, nisu bili ni blizu onoga što se dogodilo u Nju-jorku i Vašingtonu.

Utorak, 11. septembar 2001. godine, ostat će u historiji zabilježen i kao dan kada je svijet, ovoga puta udružen, odlučio krenuti u rat protiv terorizma Ne u osvetnički rat, već konačni obračun sa zlom koje nema boje, nacije i ne poznaje granice. (*Edina Sarač, Dnevni avaz, Sarajevo, 13.9.2001. str. 3*)

22.9.2001.

«Olimp» radi punom parom

Svi kapaciteti u pogonu. Radi se za njemačke i slovenačke partnere – za zonu «Proljeće-ljeto 2002».

28.9.2001.

Petnaesta sjednica Općinskog vijeća Gračanica: broj krivičnih djela u porastu

Stanje javnog reda se poboljšalo, sigurnost saobraćaja ima takode trend poboljšanja, dok je stanje kriminaliteta sa aspekta brojnosti izvršenih krivičnih djela u porastu čak za 44,6%. To se prvenstveno

odnosi na krivična djela protiv javnog reda i pravnog prometa i krivična djela protiv imovine, kaže se u Informaciji o sigurnosnoj situaciji na općini za period januar – avgust 2001. godine, koju su vijećnici prihvatili, pozitivno ocjenjujući rad Policijske uprave u Gračanici.

Usvojili su i informaciju o materijalno-socijalnom položaju porodica šehida i palih boraca, ratnih vojnih invalida, demobilisanih boraca i pripadnika NOAR-a 1941-1945. godina, izbjeglih i prognanih lica, o djelovanju i problemima u radu humanitarnih organizacija, o deponovanju otpadnih materija, smeća i ekološkoj zaštiti i o higijensko-epidemiološkoj situaciji na području općine Gračanica.

7.10.2001.

Amerika uzvraća udarac

Projektili su na Afganistan lansirani sa američkih i engleskih brodova i podmornica, a ciljevi su sistemi za protuzračnu odbranu i vojni kampovi širom Afganistana. Odgovor na terorističke napade od 11. septembra sa ko zna kakvim posljedicama...

22.10.2001.

Gračanički malonogometni klub «Kaskada» među osam najboljih u Evropi

Plasmanom među 8 najboljih malonogometnih ekipa u Evropi na međunarodnom turniru šampiona u Rotterdamu, dvostruki prvak države i osvajač Kupa BiH ostvario je ne samo najveći uspjeh u istoriji gračaničkog već i najveći poslijeratni ekipni uspjeh bh. klupskog sporta. Zasluga je to svih igrača ovog vrijednog sportskog kolektiva, a posebno njegovog direktora Nesiba Okića. Već su otpočeli pripreme za drugi dio ovog međunarodnog takmičenja u kojem će učestvovati još

sedam pobjednika ovakvih turnira u februaru sljedeće godine. To je veliki izazov za sve igrače «Kaskade» - jer, završni dio lige šampiona igra se «jednom u životu».

30. 10. 2001.

Šesnaesta sjednica Općinskog vijeća Gračanica: stvarenje Budžeta za devet mjeseci 2001. godine 2.600.000 KM ili «samo» 64%

I ova općina dijeli sudbinu opće budžetske suše na području Tuzlanskog kantona, koja već ugrožava normalno funkcionisanje takozvanih budžetskih korisnika i ostvarivanje ostalih planiranih zadataka u ovoj godini. Uzroci su poznati, posljedice bolne. Nije do opštine ili nije bar sve. Na potezu su «više instance vlasti». Ipak, usvojen je prednacrt Budžeta općine za 2002. godinu oko kojeg tek predstoje rasprave i natezanja.

Pored «budžetskih» tačaka, vijećnici su usvojili i Odluku o stipendiranju studenata i učenika srednjih škola, uz odgovarajuće kriterije za dodjelu tih stipendija, a prihvatili su i dvije informacije: o postignutom uspjehu učenika osnovnih i srednjih škola općine Gračanica na kraju školske 2000/2001. godine i o radu Općinskog tužilaštva za devet mjeseci 2001. godine.

30.10.2001.

Privatizacija: prodati «Olimp» i «Graplast»

Metodom neposredne pogodbe, većinski paket dionica od 67% državnog kapitala «Graplasta» kupili su radnici ovog preduzeća sa strateškim partnerom Ramom Kujundžićem za 828.737 Km, od čega je 10% plaćeno u gotovini, a ostatak u certifikatima. Oni su obavezni da zaposle 19 radnika koji su u toku rata ostali bez posla, a u naredne tri godine još 18 novih radnika. Istom metodom, 67% državnog

kapitala fabrike «Olimp» iz Gračanice kupili su njegovi radnici za 1,1 miliona KM. (Onasa)

30.10.2001.

«Vodovod i kanalizacija» Gračanica: privatizirano 49% kapitala

Održana je i Prva skupština dioničara, kojom je okončan proces privatizacije ovog Preduzeća. Većinski dio kapitala od 51% ostaje u državnom vlasništvu, a 49% u vlasništvu zaposlenih. To se ne odnosi na izvorišta i kapitalnu vodovodnu mrežu koja će se ustupati na korišćene po posebnim zakonima o koncesiji. Gračanički «Vodovod i kanalizacija» je prvo javno preduzeće u oblasti komunalne privrede u Federaciji BiH koje se privatizuje po ovom modelu.

9.11.2001.

Gračanici Sportska dvorana – Kompaniji «Širbegović» Certifikat «Iso standard 9001»

Uz prigodne sportske i kulturne sadržaje i u prisustvu brojnih građana i gostiju u rad je puštena sportska dvorana, locirana kod Druge osnovne škole u donjem dijelu grada. Dvorana je standardnih dimenzija (60x31 metra), ima sve prateće sadržaje i može primiti više od 1000 posjetilaca. Izgradnja sale počela je prije 6 mjeseci na inicijativu Građevinske kompanije «Širbegović» i uz podršku općine Gračanica, učešće Druge osnovne škole i nekoliko gračaničkih preduzeća. «Sportska sala» je registrovana kao dioničko društvo u vlasništvu Kompanije «Širbegović» i nekoliko drugih dioničara, koji funkcionisanje ovog objekta uspostavljaju na principu samofinansiranja i ekonomske održivosti. To je princip po kojem će se, vjerovatno, rješavati i druga pitanja društvenog standarda u razdoblju koje je pred nama.

Izgradnjom fiskulturne dvorane Kompanija «Širbegović» obezbijedila je bolji kvalitet života u Gračanici, a kvalitet svojih proizvoda «ovjerila» Certifikatom »Iso standard 9001«, koji je promovisala na ovoj svečanosti.

Simboličnim presijecanjem vrpce dvoranu su označili otvorenom Nusret Helić, aktuelni općinski načelnik i Čamil Naimkadić, jedan od najuspješnijih predsjednika općine u historiji Gračanice.

9.11.2001.

Povratak izbjeglih Srba na područje općine Gračanica: u Gornjoj Lohinji kuće useljive, ali povratka nema

Kako piše Hasan Čalić u «Dnevnom avazu» (od 9.11.2001, str. 23) «u Donji i Gornji Skipovac do sada su se vratile 23 porodice, u Lendiće dvije, Donju Lohinju tri srpske porodice, a u pitomo selo Gornju Lohinju nijedna. Dok se Bošnjaci vraćaju pod šatore i šupe u Podrinju, dok u dobojskoj regiji povratak daje odlične rezultate, dok se u Brčko dnevno vraća desetak porodica, u Gornju Lohinju i

pored na desetine praznih i useljivih kuća, povratka nema.» Srbi iz Gornje Lohinje mahom žive u tuđim kućama u Suhom Polju, Janji, Bijeljini i Doboju. Povremeno dođu u selo, nakratko posjete groblje i ponovo se vraćaju na tuđe. Ključevi njihovih kuća «požrtveni» su u ladicama nadležne opštinske službe u Gračanici.

10.11.2001.

Prijeko Brdo na asfaltu

Zahvaljujući tradicionalnoj upornosti i vlastitim odricanjima, mještani najudaljenijeg sela gračaničke općine napokon su završili «svoju» dionicu puta do Trnovaca, odnosno do Džakula u dužini od 2,5 km i sada su definitivno na asfaltu. Počeli su prošle godine uz pomoć Kantona, po principu «marka na marku», uložili su oko 136.000 KM vlastitih sredstava, kantonalna direkcija za puteve uložila je 105.000 i opština Gračanica 26.000 KM. Uporni predsjednik mjesne zajednice za proljeće planira nove akcije a prvo je na redu spomen-obilježje poginulim borcima iz tog sela u ratu za BiH 1992.-1995.

